



## OPERATIVNI LEASINGA - OPŠTI USLOVI ZA ZAKLJUČENJE UGOVORA O OPERATIVNOM LEASINGU

Ovi Opšti uslovi za operativni leasing (u daljem tekstu: **Opšti uslovi**) su sastavni dio svakog Ugovora o operativnom leasingu (u daljem tekstu: **Ugovor**). Izrazi definisani Ugovorom imaju, ako drugačije nije izričito određeno, isto značenje i u Opštim uslovima. Upotreba pojedinih odredbi Opštih uslova u Ugovoru može biti isključena samo u slučaju kada je to izričito ugovoreno.

### ZNAČENJE IZRAZA:

**Leasing** je pravni posao u kojem Davalac leasinga prenosi pravo posjedovanja i korištenja Predmeta leasinga na Korisnika leasinga na određeni vremenski rok, a zauzvrat Korisnik leasinga se obavezuje da mu za to plaća ugovorenu leasing naknadu.

**Operativni leasing** je pravni posao u kojem Korisnik leasinga u periodu posjedovanja i korištenja Predmeta leasinga plaća Davaocu leasinga određenu naknadu bez opcije kupovine i sticanja prava vlasništva nad Predmetom leasinga.

**Ugovor** podrazumijeva Ugovor o operativnom leasingu zajedno sa Opštim uslovima, Zahtjevom za zaključenje Ugovora, Ponudom, Otplatnim planom, Pozivom za prvo plaćanje, Zapisnikom o preuzimanju Predmeta leasinga u ime Davaoca leasinga, punomoćima, Aneksima na Ugovor i dodatnim ugovorima ukoliko postoje, kao njegovim sastavnim, neodvojivim i obavezujućim dijelovima. U slučaju kada se sa Korisnikom leasinga potpisuje poseban ugovor (Generalni sporazum) u kojem su neke odredbe Ugovora isključene ili drugačije definisane, primjenjivat će se odredbe Generalnog sporazuma.

**Davalac leasinga** označava „Porsche leasing“ d.o.o.

**Korisnik leasinga** označava pravno ili fizičko lice, koje je sa Davaocem leasinga zaključilo Ugovor kao glavni dužnik, na osnovu kojeg stiče pravo posjedovanja i korištenja Predmeta leasinga.

**Sudužnik** označava pravno ili fizičko lice koje je sa Davaocem leasinga zaključilo Ugovor, na osnovu kojeg odgovara Davaocu leasinga sa Korisnikom leasinga, pod jednakim uslovima kao i Korisnik leasinga, za sve obaveze Korisnika leasinga.

**Dobavljač** Predmeta leasinga je lice koje je prema slobodnoj volji i vlastitom nahođenju odabrao Korisnik leasinga, te koje na osnovu ugovora ili na drugi zakonom propisan način nabavlja i isporučuje Predmet leasinga, te na Davaoca leasinga prenosi pravo vlasništva nad Predmetom leasinga.

**Predmet leasinga** je pokretna ili nepokretna stvar, u skladu sa propisima koji uređuju vlasništvo, odnosno druga stvarna prava, nabavka i korištenje koje se finansira putem operativnog leasinga, a koja je jasno naznačena u Ugovoru.

**Leasing naknada** je novčani iznos koji Korisnik leasinga plaća Davaocu leasinga na osnovu posjedovanja i korištenja Predmeta leasinga, a čiji je iznos prikazan u Ugovoru. Ukupna naknada, koja se naplaćuje od Korisnika leasinga po Ugovoru, obuhvata troškove zaključenja Ugovora Davaoca leasinga, kao i sve ostale troškove koji su poznati i izvjesni, te je promjenjiva u skladu sa odredbama Ugovora.

**Ostatak vrijednosti** predstavlja predvidivu vrijednost, koja se određuje na osnovu očekivanog korištenja i amortizacije Predmeta leasinga ili predviđenog broja pređenih kilometara kod motornih vozila. Ostatak vrijednosti služi isključivo kao osnov za izračun mjesečne leasing naknade, te ne predstavlja otkupnu cijenu Predmeta leasinga.

**Akontacijska naknada** je iznos koji Korisnik leasinga unaprijed plaća Davaocu leasinga prilikom zaključenja Ugovora, a za koji se umanjuje iznos ukupne leasing naknade, te koja se ne vraća Korisniku leasinga u slučaju raskida Ugovora.

**Troškovi zaključenja Ugovora** obuhvataju troškove zaključenja Ugovora u iznosu izričito navedenom u Ugovoru.

**Euribor** je međubankarska referentna kamatna stopa koja se primjenjuje u zoni Eura. Utvrđuje ga Evropska bankarska federacija i Asocijacija za finansijska tržišta. Izračunava se kao prosjek kamatnih stopa u okviru panela prvoklasnih banaka koje nude sredstva na određeni period i objavljuje se od strane Evropske centralne banke ili TomsonReuters OTC.



**Strana sa ograničenjima** označava svakog pojedinca ili entitet koji je:

- naveden kao takav, u vlasništvu ili pod kontrolom lica koje se nalazi na listama sankcija,
- vlada zemlje koja se sankcioniše,
- agencija ili instrument, ili entitet direktno ili indirektno u vlasništvu ili pod kontrolom vlade sankcionisane zemlje,
- sa prebivalištem ili se nalazi u sankcionisanoj zemlji, obavlja djelatnosti iz te zemlje ili je osnovan u skladu sa zakonom sankcionisane zemlje,
- meta sankcija, prema najboljem saznanju Korisnika leasinga ili matične kompanije ili sa kojom bi saradnja Davaoca leasinga predstavljala kršenje sankcija.

**Sankcija** označava ekonomsku ili finansijsku sankciju ili trgovinski embargo ili drugu zabranu u skladu sa zakonima o borbi protiv terorizma ili zakonima u vezi zabrane izvora koji regulišu ponašanje koje nameće, uređuje ili sprovodi bilo koji organ za sankcije.

**Sankcionisana zemlja** označava svaku zemlju ili drugu teritoriju koja je predmet zajedničkog izvoznog, uvoznog, finansijskog ili investicionog embarga u vezi sa bilo kojim sankcijama počev od datuma ovog sporazuma, uključujući Krim nevladine kontrolisane strane u oblastima Donjecka i Luganska u Ukrajini, Krimu, Kubi, Iranu, Sjevernoj Koreji i Siriji.

**Institucije za sankcionisanje su:**

- Sjedinjene Američke Države,
- Savjet bezbjednosti Ujedinjenih nacija,
- Evropska Unija ili bilo koja njena država članica,
- Ujedinjeno Kraljevstvo,
- organi Bosne i Hercegovine ili
- odgovarajuće vladine institucije bilo koje od gore navedenih institucija.

**Sankcioni spisak** označava bilo koju od lista posebno određenih državljana, određenih ili sankcionisanih pojedinaca ili entiteta (ili ekvivalenata) koje izdaje institucija za sankcije sa periodičnim izmjenama, dopunama ili zamjenama.

**Primjena** Ugovora počinje na dan preuzimanja Predmeta leasinga od strane Korisnika leasinga.

#### 1. ZAKLJUČENJE UGOVORA I TROŠKOVI ZAKLJUČENJA UGOVORA

1.1 Osnov za zaključenje Ugovora predstavlja Zahtjev za zaključenje Ugovora. Nakon obavještenja Davaoca leasinga Korisniku leasinga o odobrenju finansiranja, Ugovor se potpisuje, čime Korisnik leasinga preuzima prava i obaveze koje proizilaze iz Ugovora. Primjena Ugovora počinje na dan preuzimanja Predmeta leasinga od strane Korisnika leasinga.

1.2 Davalac leasinga će Korisniku leasinga, pri zaključenju Ugovora, obračunati jednokratni trošak zaključenja Ugovora, uvećan za porez na dodanu vrijednost, za pripremu i zaključenje Ugovora, koji je Korisnik leasinga dužan platiti u skladu sa Pozivom za prvo plaćanje.

1.3 Korisnik leasinga se obavezuje da od Davaoca leasinga, po njegovom pozivu, bez odlaganja preuzme Predmet leasinga na dogovorenom mjestu i u dogovoreno vrijeme. Korisnik leasinga snosi sve troškove prevoza Predmeta leasinga i osiguranja prevoza koji nastanu nakon što Korisnik leasinga primi poziv za preuzimanje Predmeta leasinga.

1.4 Ukoliko nakon prijema poziva za preuzimanje Predmeta leasinga Korisnik leasinga to odbije, Ugovor se raskida, a Davalac leasinga ima pravo zadržati ugovorenu akontacijsku naknadu, ugovorene troškove obrade zahtjeva za zaključenje Ugovora i obračunati naknadu u iznosu od 18 % od zbira svi preostalih neto leasing naknada uvećano za pripadajući PDV.

1.5 Ukoliko Korisnik leasinga poslije preuzimanja Predmeta leasinga raskine Ugovor, dužan je o tome obavijestiti Davaoca leasinga pisanim putem, te u roku od osam (8) dana od dana raskida Ugovora izvršiti povrat Predmeta leasinga Davaocu leasinga, o vlastitom trošku. U tom slučaju, Korisnik leasinga dužan je odmah, a najkasnije u roku od osam (8) dana od dana raskida Ugovora isplatiti Davaocu leasinga naknadu u vrijednosti od 18% od zbira svih preostalih neto leasing naknada uvećano za pripadajući PDV.

1.6 Ukoliko Korisnik leasinga ne ispuni svoju obavezu iz prethodnog stava ovog člana, svaka dostava obavijesti i drugih pisama Korisniku leasinga na adresu navedenu u Ugovoru smatrat će se važećom, bez obzira da li je Korisnik leasinga primio pošiljku ili ne, a danom prijema preporučene pošiljke smatrat će se dan slanja iste od strane Davaoca leasinga.

1.7 Pisana komunikacija između Davaoca leasinga i Korisnika leasinga vrši se prema adresi, poštanskoj i/ili elektronskoj, o kojoj je Korisnik leasinga obavijestio Davaoca leasinga. Jednostrana obavještenja Davalac leasinga može slati i upotrebom elektronskih servisa, mobilnih aplikacija, odnosno slanjem tekstualne poruke na broj telefona Korisnika leasinga registrovan kod Davaoca leasinga u skladu sa relevantnim propisima.



## 2. AKONTACIJSKA NAKNADA / PLAĆANJE PRIJE ISPORUKE

2.1 Akontacijska naknada, ukoliko je ugovorena i iskazana odredbama Ugovora, je iznos koji Korisnik leasinga unaprijed plaća Davaocu leasinga prilikom zaključenja Ugovora, a za koji se umanjuje iznos ukupne leasing naknade. Akontacijska naknada se ne vraća Korisniku leasinga u slučaju raskida Ugovora.

2.2 Prije preuzimanja Predmeta leasinga, Korisnik leasinga je dužan na transakcijski račun Davaoca leasinga (račun br: 161 00001381300 48 kod Raiffeisen Bank d.d. Bosna i Hercegovina), izvršiti uplatu po Pozivu za prvo plaćanje, koja se sastoji od: akontacijske naknade, prve mjesečne leasing naknade ukoliko je ugovorena, troškova zaključenja Ugovora, ostalih troškova povezanih sa zaključenjem Ugovora i pripadajućih poreza. Odredbama Ugovora Ugovorne strane mogu isključiti plaćanje nekog od navedenih elemenata prvog plaćanja.

2.3 Korisnik leasinga ovim putem izričito potvrđuje da je Predmet leasinga, kao i Dobavljača sam izabrao, te da je sam ugovorio uslove isporuke i cijenu Predmeta leasinga. Ako Davalac leasinga prije isporuke plati Predmet leasinga u potpunosti ili djelimično, u skladu sa uslovima Dobavljača, Korisnik leasinga u potpunosti preuzima rizik isporuke Predmeta leasinga.

2.4 Dobavljač odgovara Korisniku leasinga za isporuku Predmeta leasinga.

2.5 Ukoliko akontacijska naknada nije ugovorena isključena je primjena članova 2.1. i 2.2 Opštih uslova, osim dijela člana 2.2 koji se odnosi na prvo plaćanje koje u tom slučaju obuhvata ostale ugovorene naknade izuzev akontacijske naknade.

## 3. LEASING NAKNADA - VISINA I NAČIN PLAĆANJA, PRILAGOĐAVANJE LEASING NAKNADE

3.1 Leasing naknada obračunata je u valuti EUR, te iskazana u protuvrijednosti domaće valute konvertibilnim markama (KM), prema srednjem kursu Centralne banke Bosne i Hercegovine na dan plaćanja.

3.2 Korisnik leasinga je dužan za sve vrijeme trajanja Ugovora plaćati Davaocu leasinga ugovorene leasing naknade za korištenje Predmeta leasinga, Davalac leasinga će Korisniku leasinga za svaku mjesečnu leasing naknadu ispostaviti račun sa opštim rokom plaćanja koji je iskazan ispostavljenim računom. Ukoliko Korisnik leasinga ima više zaključenih pojedinačnih ugovora, Davalac leasinga može izdavati jednu fakturu za mjesečne naknade po svim ugovorima, ukoliko Ugovorne strane o tome postignu saglasnost zaključenjem Generalnog sporazuma.

3.3 Ukoliko Ugovorne strane postignu saglasnost o odloženom plaćanju usluga Ugovorom će biti označeno ugovoreno posebno dospijeće plaćanja računajući od datuma opšteg roka plaćanja u kojem je Korisnik leasinga obavezan da izvrši plaćanje.

3.4 Davalac leasinga će prilikom knjigovodstvene obrade uplata zatvarati najstarije obaveze Korisnika leasinga prema sljedećem redosljedu: (I) troškovi i porezi plaćeni u ime Korisnika leasinga, (II) zakonske zatezne kamate, (III) administrativni troškovi Davaoca leasinga, te (IV) mjesečna leasing naknada.

3.5 Mjesečna leasing naknada za Predmet leasinga, odnosno, ukupna leasing naknada zavisi od vrijednosti vozila, visine akontacijske naknade, troškova zaključenja Ugovora, troškova provjere Korisnika i Predmeta leasinga, dužine trajanja Ugovora, ugovorene kilometraže, predvidivog ostatka vrijednosti vozila po isteku ugovora, marže i tromjesečnog EURIBOR-a ukoliko se isti posebno ugovori.

3.6 Ukoliko je Ugovor zaključen sa primjenom EURIBOR-a, Korisnik leasinga uz Ugovor o operativnom leasingu dobija Otplatni plan sa svim elementima izračuna leasing naknade i posebno iskazanim tromjesečnim EURIBOR-om koji je utvrđen je na zadnji dan prethodnog kvartala prema posljednjoj objavljenoj informaciji od strane Evropske centralne banke ili TomsonReuters OTC u odnosu na datum zaključenja Ugovora.

3.7 Prilagođavanje mjesečne leasing naknade za predmet leasinga, odnosno, ukupne leasing naknada će se vršiti po završetku svakog kvartala u slučaju promjene tromjesečnog EURIBOR-a, ako je povećanje ili smanjenje istog veće od +/- 0,25 procentnih poena u odnosu na inicijalno korišteni ili sa promjenama usklađeni EURIBOR. Prilikom svake promjene EURIBOR-a koja ispunjava navedene uslove, Davalac leasinga će izvršiti usklađivanje leasing naknade o čemu će Korisnika leasinga obavijestiti pismenim ili elektronskim putem prije dospijeća tako usklađene mjesečne leasing naknade. Svaki novi - usklađeni Otplatni plan će biti dostavljen Korisniku leasinga i bit će obavezujući i sastavni je dio Ugovora o operativnom leasingu.

3.8 Korisnik leasinga potpisom na Ugovoru o leasingu potvrđuje da je upoznat sa svim uslovima iz Ugovora kao i Opštim uslovima, te da mu je poznato i da prihvata da u toku trajanja Ugovora može doći do promjene mjesečne leasing naknade uslijed promjene EURIBOR-a. Ovakvo usklađivanje neće se smatrati izmjenom ili dopunom Ugovora te za isto neće biti potrebna saglasnost Korisnika leasinga.

3.9 Ukoliko od trenutka zaključenja Ugovora do trenutka isporuke Predmeta leasinga bude izmijenjena nabavna vrijednost ili dodatni troškovi uslijed bilo kojeg razloga, ili budu izmijenjeni iznosi carine, poreza, premija osiguranja i ostalih davanja, odnosno uvedeni novi troškovi od strane državnih organa na koje izmjene Ugovorne strane nemaju uticaja, Davalac leasinga ima pravo prilagoditi leasing naknadu u skladu sa navedenim promjenama.

3.10 Ako Davalac leasinga plati u ime i za račun Korisnika leasinga ostale troškove (troškove osiguranja koje je bio obavezan da plati Korisnik leasinga, prekršajnih naknada / kazni ili nekih drugih kazni i sl.) u toku trajanja Ugovora, isti će biti fakturisani Korisniku leasinga od strane Davaoca leasinga, u visini stvarnih troškova, a u skladu sa Pravilnikom o naknadama Davaoca leasinga. Troškovi nastali za Davaoca leasinga u svrhu naplate dospjelih potraživanja, kao što su troškovi advokata, suda i sl. bit će zaračunati Korisniku leasinga u visini stvarnih troškova.

3.11. Ukoliko tokom trajanja Ugovora od momenta preuzimanja Predmeta leasinga dođe do određenih promjena odlukama državnih organa, a na koje Davalac leasinga nije mogao uticati, kao što su npr. promjene visine poreza, administrativnih naknada, taksu i slično, Davalac leasinga ima pravo na odgovarajući način prilagoditi iznos leasing naknade. Ovakvo usklađivanje neće se smatrati izmjenom ili dopunom Ugovora te za isto neće biti potrebna saglasnost Korisnika leasinga.



3.12 Ukoliko je Predmet leasinga motorno vozilo, a Ugovorom je predviđena određena kilometraža u korištenju Predmeta leasinga i ukoliko korištenjem Predmeta leasinga tako ugovorena kilometraža bude prekoračena, Korisnik leasinga je dužan platiti dodatnu naknadu (naknada za više pređenu kilometražu po osnovu uvećane amortizacije) Davaocu leasinga koja je utvrđena Ugovorom o operativnom leasingu. Ako Korisnik leasinga tokom trajanja Ugovora primijeti da obim korištenja vozila odstupa od Ugovorom utvrđene godišnje kilometraže, može zahtijevati od Davaoca leasinga da sačini novu kalkulaciju sa novom kilometražom i izvrši odgovarajuće usklađivanje leasing naknade, povodom čega će Ugovorne strane sačiniti poseban aneks Ugovora. Ukoliko Korisnik leasinga propusti pravo da zahtijeva usklađivanje leasing naknade u toku trajanja Ugovora, dužan je platiti dodatnu naknadu za više pređenu kilometražu po isteku Ugovora.

3.13 Davalac leasinga će blagovremeno pisanim putem obavijestiti Korisnika leasinga o svakoj promjeni mjesečne leasing naknade.

3.14 Sve uplate će se smatrati blagovremenim uplatama ukoliko su proknjižene na transakcijski račun Davaoca leasinga prije, kao i na dan dospijeca određen na osnovu ispostavljenih računa. Prijevremeno uplaćeni iznosi za mjesečne leasing naknade se ne vraćaju, na njih se ne obračunava kamata, niti revaloriziraju, već se rasknjizavaju pri dospijecu sljedeće mjesečne leasing naknade.

3.15 Ukoliko Korisnik leasinga kasni sa plaćanjem dospjelih obaveza iz ovog Ugovora, po bilo kojem osnovu, dužan je platiti zakonsku zateznu kamatu za svaki dan kašnjenja, po stopi od 10% godišnje u skladu sa Zakonom o visini stope zatezne kamate FBiH, odnosno 10,95% godišnje u skladu sa Zakonom o visini stope zatezne kamate RS, kao i trošak svake opomene na plaćanje u iznosu određenom ovim Opštim uslovima, te sve troškove nastale zbog namirenja ili osiguranja potraživanja iz Ugovora i sve sudske i van sudske troškove.

3.16 Korisnik leasinga, koji kasni sa plaćanjem dospjelih obaveza iz Ugovora, će pored zatezne kamate iz prethodnog stava nadoknaditi Davaocu leasinga i trošak svake opomene poslane poštom u iznosu od 1,00 KM (slovima: jedan i 00/100 KM) za prvu opomenu, 2,00 KM (slovima: dvije i 00/100 KM) za drugu opomenu i 3,00 KM (slovima: tri i 00/100 KM) za treću opomenu, uvećano za porez na dodanu vrijednost prema zakonskim propisima, kao i sve troškove nastale zbog namirenja ili osiguranja potraživanja iz Ugovora i sve sudske i van sudske (advokatske i sl.) troškove, troškove ovlaštenih lica od strane Davaoca leasinga, troškove traženja adrese i sl., u visini stvarnih troškova, a u skladu sa Pravilnikom o naknadama Davaoca leasinga.

3.17 Korisnik leasinga nema pravo kompenzirati svoja moguća potraživanja prema Davaocu leasinga sa potraživanjima iz Ugovora, bez izričite pisane saglasnosti Davaoca leasinga.

3.18 Ugovorene leasing naknade ni u kojem slučaju ne uključuju finansiranje popravke i održavanje dodatne opreme naknadno ugrađene u vozilo, popravke i kvarove koji su nastali uslijed nestručnog upravljanja i održavanja od strane Korisnika leasinga, kao i sve ostale troškove koji nisu ranije predviđeni i uračunati u mjesečnu leasing naknadu, popravke, kvarove, zamjenu dijelova koji su izvršeni u neovlaštenom servisu ili su posljedica neuobičajenog korištenja Predmeta leasinga, zamjenu dijelova koji nisu originalni i u skladu sa preporukom ovlaštenog dobavljača i proizvođača, popravku unutrašnjih presvlaka i tapaciranih dijelova, popravku multifunkcionalnog radio uređaja, navigacijskog sistema, popravke oštećenih lakiranih i zahrđalih površina, svih drugih nepredviđenih troškova, poreza, taksi, kazni, te svih direktnih ili indirektnih davanja i tereta, te ostalih davanja čiji iznos i vrstu stranke nisu mogle odrediti i predvidjeti u vrijeme zaključenja Ugovora, a koji su nastali u vezi sa Ugovorom i njegovim ispunjenjem.

3.19 Davalac leasinga je obavezan bez naknade jednom godišnje, na zahtjev Korisnika leasinga, izdati pregled njegovih obaveza i izvršenih plaćanja.

#### **4. ISPORUKA / PREUZIMANJE I KARAKTERISTIKE PREDMETA LEASINGA I ODGOVORNOST ZA PRAVNE I MATERIJALNE NEDOSTATKE**

4.1 Korisnik leasinga je sam odabrao Predmet leasinga, te se neposredno kod Dobavljača upoznao sa uslovima isporuke i cijene Predmeta leasinga.

4.2 Davalac leasinga preuzima obavezu finansiranja nabavke Predmeta leasinga od Dobavljača, ali ne odgovara za rokove i uslove isporuke, kao ni za svojstva Predmeta leasinga ili ispunjenje obaveznih uslova u pogledu kvaliteta i drugih uslova Predmeta leasinga po posebnim propisima čija je primjena obavezna u Bosni i Hercegovini, kao ni posebnim propisima kojima se uređuje kvalitet određenih proizvoda.

4.3 Dobavljač će na svoj rizik i o svom trošku preduzeti sve potrebne radnje i mjere za prevoz, osiguranje i stavljanje u pogon Predmeta leasinga. Dobavljač vrši isporuku Predmeta leasinga neposredno Korisniku leasinga na dogovorenom mjestu i u dogovoreno vrijeme.

4.4 Za sve materijalne nedostatke na Predmetu leasinga odgovara isključivo Dobavljač, odnosno proizvođač, te je shodno tome Korisnik leasinga dužan sve zahtjeve koji se odnose na ispravno funkcionisanje Predmeta leasinga uputiti direktno Dobavljaču, odnosno proizvođaču Predmeta leasinga. Davalac leasinga ustupa Korisniku leasinga svoje zahtjeve iz garantnog lista prema Dobavljaču, odnosno proizvođaču Predmeta leasinga, ali se ni u kojem slučaju Davalac leasinga ne odriče svojih prava iz garancije Predmeta leasinga.

4.5 Mogući nedostaci Predmeta leasinga, odnosno ograničenje u mogućnosti korištenja Predmeta leasinga ili razdoblje mirovanja Predmeta leasinga neće imati uticaja na obaveze Korisnika leasinga iz Ugovora, te ne mogu biti osnov za bilo kakav zahtjev Korisnika leasinga prema Davaocu leasinga.



4.6 Davalac leasinga ne odgovora za ispunjenje obaveznih uslova u pogledu kvaliteta i drugih uslova Predmeta leasinga po posebnim propisima čija je primjena obavezna u Bosni i Hercegovini, kao ni posebnim propisima kojima se uređuje kvalitet određenih proizvoda.

4.7 Davalac leasinga ne ustupa Korisniku leasinga svoje pravo iz garantnog lista na povrat uplaćene cijene.

4.8 Prilikom preuzimanja Predmeta leasinga sačinjava se Zapisnik o preuzimanju u tri (3) primjerka koji potpisuju i ovjeravaju pored Davaoca leasinga i predstavnici Dobavljača i Korisnika leasinga, od kojih po jedan primjerak Zapisnika zadržavaju Korisnik leasinga, Dobavljač i Davalac leasinga. Potpisivanjem Zapisnika o preuzimanju Predmeta leasinga, Korisnik leasinga potvrđuje da je Predmet leasinga preuzeo u svoj posjed u ispravnom stanju.

4.9 Korisnik leasinga je obavezan da bez odlaganja obavijesti Davaoca leasinga o bilo kakvom sporu ili zahtjevu koji je povodom Predmeta leasinga pokrenulo bilo koje treće lice koje tvrdi da polaže pravo na Predmet leasinga.

## **5. VLASNIŠTVO PREDMETA LEASINGA I KORIŠTENJE PREDMETA LEASINGA**

5.1 Za sve vrijeme trajanja Ugovora, kao i nakon njegovog prestanka, isključivi vlasnik Predmeta leasinga je Davalac leasinga, a Korisnik leasinga na osnovu Ugovora ne može steći pravo vlasništva nad istim. Korisnik leasinga ima pravo posjedovanja i korištenja Predmeta leasinga, pod uslovom da uredno izmiruje svoje obaveze iz Ugovora prema Davaocu leasinga.

5.2 Korisnik leasinga nema pravo priskvajanja ili drugo slično pravo na Predmetu leasinga, bez obzira iz kojeg odnosa i po kojem osnovu potiče eventualno potraživanje Korisnika leasinga prema Davaocu leasinga.

5.3 Korisnik leasinga ne može Predmet leasinga otuđiti, opteretiti niti dati u zakup, odnosno najam. Korisniku leasinga se izričito zabranjuje da pravnim poslom ili po bilo kojem drugom osnovu otuđuje Predmet leasinga, daje Predmet leasinga na korištenje trećim licima koja nisu navedena u listi korisnika iz Ovlaštenja za korištenje vozila, koja nisu osposobljena za njegovo korištenje i koja nemaju prethodnu pisanu saglasnost Davaoca leasinga. Korisniku leasinga se također zabranjuje da uspostavlja založna prava na Predmetu leasinga, ili da na bilo koji drugi način ugrožava ili krši pravo vlasništva Davaoca leasinga nad Predmetom leasinga.

5.4 Potpisom ovih Opštih uslova, Korisnik leasinga garantuje da Predmet leasinga neće koristiti za obavljanje rent-a-car djelatnosti, auto-škole ili bilo koje druge neuobičajene poslovne djelatnosti, osim ako takva djelatnost nije izričito navedena u Ugovoru ili posebnom sporazumu/ovlaštenju, zaključenog, odnosno datog, u pisanoj formi, da u vezi sa Predmetom leasinga neće zaključivati ugovor o poslovnoj saradnji, franšizingu ili neki drugi sličan ugovor na osnovu koga će u bilo kojem obliku treće lice steći pravo ili mogućnost da neposredno koristi Predmet leasinga, bez obzira na to da li je trećem licu takvo pravo prenjeto faktički ili samim Ugovorom, da neće na Predmetu leasinga uspostavljati založna prava ili na bilo koji drugi način ugrožavati ili umanjivati pravo svojine i posredne državine Davaoca leasinga nad Predmetom leasinga.

5.5 Neovisno o tome da li je Dobavljač isporučio Predmet leasinga Davaocu leasinga ili direktno Korisniku leasinga, pravo vlasništva nad Predmetom leasinga stiče Davalac leasinga.

5.6 Korisnik leasinga je dužan odmah obavijestiti Davaoca leasinga o sudskom ili nekom drugom postupku, odnosno mjeri trećeg lica nad Predmetom leasinga ili nad njegovim dijelovima, kao što je zapljena, oduzimanje i slično. Korisnik leasinga je obavezan da preduzme sve potrebne mjere i radnje da zaštiti pravo vlasništva Davaoca leasinga.

5.7 Korisnik leasinga dužan je na Predmet leasinga dosljedno primjenjivati posebne zakonske propise i poslovne običaje koji se za operativni leasing primjenjuju u knjigovodstvu i poreznom pravu.

5.8 Korisnik leasinga dužan je pribaviti prethodnu pisanu saglasnost Davaoca leasinga za bilo kakve modifikacije ili izmjene Predmeta leasinga ili njegovo povezivanje sa nepokretnim ili pokretnim predmetima.

5.9 Korisnik leasinga se obavezuje da u slučaju pokretanja postupka stečaja ili likvidacije nad njim, o tome bez odlaganja obavijesti Davaoca leasinga, koji u tom slučaju ima pravo odmah raskinuti Ugovor i zahtijevati povrat Predmeta leasinga, bez ikakve odgovornosti Davaoca leasinga za raskid Ugovora i povrat Predmeta leasinga. U takvom slučaju, Korisnik leasinga dužan je da stečajnog ili likvidacionog upravnika obavijesti o vlasništvu Davaoca leasinga nad Predmetom leasinga.

## **6. REGISTRACIJA PREDMETA LEASINGA I PRODUŽENJE REGISTRACIJE**

6.1 Korisnik leasinga prema mjestu svog prebivališta, odnosno sjedišta, podnosi zahtjev za registraciju ili produženje registracije Predmeta leasinga nadležnom policijskom organu, koji Korisniku leasinga izdaje saobraćajnu dozvolu, a Davaocu leasinga potvrdu o vlasništvu. Shodno tome, Davalac leasinga će Korisniku leasinga izdati ovlaštenje za registraciju i ovlaštenje za korištenje Predmeta leasinga.

6.2 Troškove registracije, tehničkog pregleda, osiguranja i druge povezane troškove snosit će isključivo Korisnik leasinga.

6.3 Korisnik leasinga se obavezuje da najkasnije osam (8) dana prije isteka roka važenja potvrde o registraciji Predmeta leasinga, preuzme od Davaoca leasinga ovlaštenje za produženje godišnje saobraćajne registracije i preduzme ostale potrebne radnje. Sve troškove vezane za produženje saobraćajne registracije Predmeta leasinga, za vrijeme trajanja Ugovora, snosit će Korisnik leasinga.

6.4 U slučaju da Korisnik leasinga ne izmiruje svoje obaveze u skladu sa Ugovorom, Davalac leasinga zadržava pravo da kao vlasnik Predmeta leasinga uskrati Korisniku leasinga saglasnost za produženje saobraćajne registracije Predmeta leasinga, a Korisnik leasinga je u tom slučaju dužan vratiti Predmet leasinga u posjed Davaoca leasinga.



## 7. ODRŽAVANJE I ODGOVORNOST ZA PREDMET LEASINGA

7.1 Korisnik leasinga dužan je, za sve vrijeme trajanja Ugovora, Predmet leasinga držati u dobrom i ispravnom stanju, koje omogućava njegovu redovnu upotrebu, te postupati s Predmetom leasinga u skladu sa njegovom namjenom i tehničkim svojstvima, sa dužnom pažnjom, stalno vodeći računa o tome da Predmet leasinga bude u stanju u kakvom mu je predat od strane Dobavljača, imajući pri tome u vidu trošenje Predmeta leasinga primjereno njegovoj pravilnoj upotrebi i starosti.

7.2 Korisnik leasinga je dužan pridržavati se uputstava proizvođača o servisiranju, održavanju i upotrebi Predmeta leasinga. Održavanje i popravka Predmeta leasinga mogu biti obavljani isključivo u servisima Dobavljača ili kod ovlaštenih servisera koji su potvrđeni u garantnom listu. U održavanju Predmeta leasinga, Korisnik leasinga se obavezuje da koristi isključivo originalne rezervne dijelove.

7.3 Održavanje vozila iz prethodnog stava obavlja Korisnik leasinga o svom trošku.

7.4 Ako je za Predmet leasinga propisan tehnički pregled, atestiranje ili ispitivanje njegovog kvaliteta, onda je Korisnik leasinga dužan takav pregled obavljati redovno i pravovremeno, o svom trošku.

7.5 Bilo kakve modifikacije ili izmjene Predmeta leasinga ili njegovo povezivanje sa nepokretnim ili pokretnim predmetima bit će dozvoljeno samo uz prethodnu pisanu saglasnost Davaoca leasinga. Bilo kakva izmjena, modifikacija i/ili dodatna instalacija u vezi sa Predmetom leasinga bez pisane saglasnosti Davaoca leasinga, postat će vlasništvo Davaoca leasinga bez bilo kakve naknade. U slučaju da u toku trajanja Ugovora zakonski bude potrebno da se modifikira Predmet leasinga, Korisnik leasinga će to obaviti o svom trošku bez prava na bilo kakvu naknadu od Davaoca leasinga.

7.6 Ukoliko Korisnik leasinga sam ugrađuje dodatne brave, alarmne uređaje i sličnu opremu za zaštitu Predmeta leasinga, dužan je da za to pribavi pisanu saglasnost Davaoca leasinga i da mu preda odgovarajuća sredstva za otključavanje, odnosno deblokadu takvih dodatnih brava, alarmnih uređaja i slične opreme.

7.7 Korisnik leasinga preuzima na sebe sve rizike vezane za posjed, držanje i pogon, odnosno korištenje Predmeta leasinga. Korisnik leasinga se također obavezuje da će osloboditi Davaoca leasinga svih zahtjeva koje bi treće osobe prema njemu postavile, a koji se temelje ili proizilaze iz posjeda, držanja i korištenja Predmeta leasinga, uključujući i zahtjeve za naknadu štete nanesene trećim osobama, bez obzira da li je ona nastala ličnom krivicom, krivicom trećih osoba, zloupotrebom, slučajem ili višom silom, te zahtjeva po osnovu zaštite autorskih prava, prava na patent, model, uzorak ili žig i svaku drugu sličnu zaštićenu tvorevinu, odnosno pravo. U slučaju da za Davaoca leasinga nastane obaveza koja se temelji ili proizilazi iz posjeda nad Predmetom leasinga, Korisnik leasinga se obavezuje da će ovu obavezu izmiriti o svom trošku.

7.8 Davalac leasinga kao vlasnik Predmeta leasinga, ili drugo od njega ovlašteno lice, ima pravo tokom trajanja Ugovora uvijek i bez prethodne najave pregledati Predmet leasinga, ispitati njegova svojstva i provjeriti da li se Predmet leasinga koristi u skladu sa njegovom namjenom i dužnom pažnjom. U slučaju da Korisnik leasinga onemogućiti Davaocu leasinga pregled Predmeta leasinga u roku od petnaest (15) dana od dana kada je Davalac leasinga to zahtijevao pisanim putem od Korisnika leasinga, Davalac leasinga ima pravo raskinuti Ugovor i zahtijevati povrat Predmeta leasinga.

7.9 Davalac leasinga će jednom godišnje pismenim ili elektronskim (mail korespondencija) putem zatražiti od Korisnika leasinga informaciju o pređenoj kilometraži i stanju vozila, a u cilju provođenja godišnjeg popisa vozila. U slučaju da Korisnik leasinga ne dostavi tražene informacije pismenim ili elektronskim (mail korespondencija) putem u roku od petnaest (15) dana od dana kada je Davalac leasinga to zahtijevao od Korisnika leasinga, Davalac leasinga ima pravo raskinuti Ugovor i zahtijevati povrat Predmeta leasinga.

7.10 Korisnik leasinga se obavezuje da će dokumentaciju vezanu za korištenje Predmeta leasinga (saobraćajnu dozvolu, police osiguranja i slično) držati isključivo kod sebe, a ne u Predmetu leasinga.

7.11 Korisnik leasinga dužan je da u slučaju gubitka ključa, saobraćajne dozvole, kôd kartice ili master ključa Predmeta leasinga, kao i u slučaju pljenidbe ili oštećenja Predmeta leasinga, o tome obavijesti Davaoca leasinga i osiguravajuće društvo pisanim putem, sve u roku od osam (8) dana.

7.12 Predmet leasinga smije koristiti isključivo Korisnik leasinga, te eventualno osobe navedene u listi korisnika iz Ovlaštenja za korištenje Predmeta leasinga. Korisnik leasinga je dužan obavijestiti osiguravajuće društvo o listi korisnika iz ovlaštenja za korištenje.

7.13 Korisnik leasinga se obavezuje predati Davaocu leasinga sredstva za deblokadu pogona, alarma i ostalih sigurnosnih uređaja koje naknadno ugradi u Predmet leasinga.

7.14 U slučaju nastanka štetnog događaja (npr. krađe), te nemogućnosti naplate osiguranja zbog neposjedovanja potrebne dokumentacije (npr. saobraćajne dozvole) ili drugog propusta koji se može staviti na teret Korisniku leasinga, Korisnik leasinga dužan je nadoknaditi Davaocu leasinga tako nastalu štetu.

7.15 Za prekršaje koji su u neposrednoj vezi sa korištenjem Predmeta leasinga odgovara isključivo Korisnik leasinga. Korisnik leasinga dužan je Davaocu leasinga nadoknaditi sve stvarne troškove koje pretrpi odlukom državnog organa povodom učinjenog prekršaja.

## 8. OSIGURANJE PREDMETA LEASINGA

8.1 Za sve vrijeme trajanja Ugovora Korisnik leasinga je dužan, o svom trošku, u ime Davaoca leasinga kao korisnika osiguranja (osiguranika), zaključiti ugovor o kasko i obaveznom osiguranju Predmeta leasinga. Korisnik leasinga je dužan, bez odlaganja, dostaviti Davaocu leasinga jedan originalni primjerak police kasko osiguranja nakon zaključenja iste.



8.2 Korisnik leasinga ima pravo samostalno odabrati osiguravajuće društvo prema listi osiguravajućih društava prihvatljivih za Davaoca leasinga, te ima pravo promjene istog tokom trajanja Ugovora, ali uz prethodnu pisanu saglasnost Davaoca leasinga, a prema listi osiguravajućih društava prihvatljivih za Davaoca leasinga.

8.3 Zaključena polica osiguranja mora biti vinkulirana u korist Davaoca leasinga, a jedan originalni primjerak važeće police osiguranja mora biti dostavljen Davaocu leasinga.

8.4 U slučaju neizmirivanja obaveza prema osiguravajućem društvu po osnovu kasko osiguranja Davaoca leasinga može Korisniku leasinga poslati obavijest o navedenom kašnjenju o trošku Korisnika leasinga.

## 9. OSIGURANI SLUČAJ I NAKNADA ŠTETE

9.1 U slučaju štetnog događaja (djelimična šteta ili kvar), Korisnik leasinga se obavezuje da bez odlaganja izvrši prijavu štetnog događaja osiguravajućem društvu, te preduzme sve radnje i mjere u skladu sa uslovima osiguravajućeg društva propisanim za postupak prijave, procjene i likvidacije štete, kao i da odmah dostavi Davaocu leasinga pisanu prijavu štete, odnosno kvara te dopremi Predmet leasinga na popravak isključivo u najbliži ovlašteni servis.

9.2 U slučaju krađe ili totalne štete na Predmetu leasinga, Korisnik leasinga se obavezuje da bez odlaganja podnese prijavu krađe ili totalne štete nadležnom policijskom organu, kao i osiguravajućem društvu, te da o tome odmah pisanim putem obavijesti Davaoca leasinga. U tom slučaju dolazi do raskida Ugovora u roku od šezdeset (60) dana od prijema pisanog obavještenja od osiguravajućeg društva da je nastupila krađa ili totalna šteta na Predmetu leasinga, pri čemu je Korisnik leasinga dužan izmiriti sve fakturisane obaveze do dana raskida Ugovora, osim u slučaju krađe ako u tom roku Predmet leasinga ne bude pronađen i vraćen Davaocu leasinga.

9.3 U slučaju da pretrpljena šteta ne bude nadoknađena u cjelini ili djelimično od strane društva za osiguranje, a na osnovu uslova osiguranja i ugovora o osiguranju (police osiguranja) sa kojima je Korisnik leasinga upoznat prije potpisivanja ovog Ugovora, Korisnik leasinga se obavezuje da Davaocu leasinga isplati ukupnu štetu i nadoknadi dio neisplaćene štete i sve dodatne troškove (uključujući i učešće u šteti ukoliko je predviđeno policom osiguranja), odnosno o svom trošku vrati Predmet leasinga u prvobitno stanje. Visinu štete će procijeniti stručno lice (ovlašteni sudski vještak) koje odredi Davaoca leasinga. Korisnik leasinga se obavezuje da procijenjeni iznos štete i sve troškove procjene visine štete uplati na račun Davaoca leasinga u roku od osam (8) dana od procjene iste. Korisnik leasinga izričito izjavljuje da je saglasan da se u svrhu naknade štete mogu koristiti i sredstva obezbjeđenja plaćanja iz Ugovora.

9.4 Ukoliko se vozilo koristi za obavljanje posebne djelatnosti/namjene (rent-a-car, autoškola, podzakup i sl.) o kojoj Korisnik leasinga nije prilikom zaključenja obavijestio Davaoca leasinga radi ugovaranja kasko police po uslovima predviđenim za ove djelatnosti, Korisnik leasinga je dužan da nadoknadi svu stvarnu štetu koju pretrpi Davaoca leasinga i to posebno štetu iz prethodnog člana.

9.5 U slučaju totalne štete na Predmetu leasinga, Korisnik leasinga dužan je olupinu Predmeta leasinga vratiti u posjed Davaoca leasinga. Prevoz olupine Predmeta leasinga bit će obavljen o trošku Korisnika leasinga, a sredstva ostvarena prodajom olupine Predmeta leasinga prvenstveno služe za namirenje preostalih obaveza Korisnika leasinga prema Davaocu leasinga.

9.6 Ako je do štete došlo uslijed neodgovornog korištenja i neispravnosti na Predmetu leasinga, Davaoca leasinga nije odgovoran Korisniku leasinga ili trećem licu za štetu nastalu korištenjem Predmeta leasinga.

9.7 Korisnik leasinga u potpunosti snosi svaku odgovornost za štetu nanesenu trećim licima, kao i za kršenje propisa iz oblasti sigurnosti saobraćaja u skladu sa važećim propisima.

## 10. SREDSTVA OBEZBJEĐENJA UGOVORA

10.1 Davaoca leasinga će sa Korisnikom leasinga izričitim odredbama Ugovora u skladu sa procjenom boniteta ugovoriti neko od sljedećih sredstava obezbjeđenja:

- Mjenica - vrijednosni papir i vjerodostojna isprava koja sadrži obavezu na bezuvjetno plaćanje novčanog iznosa. Davaoca leasinga kao mjenični povjerilac može pokrenuti izvršni sudski postupak na osnovu vjerodostojne isprave,
- Sudužništvo, kojim Sudužnik preuzima obavezu da Davaocu leasinga odgovara za cijelu obavezu Korisnika leasinga tako da Davaoca leasinga može zahtijevati njeno ispunjenje bilo od glavnog dužnika, tj. Korisnika leasinga, bilo od Sudužnika ili od obojice u isto vrijeme,
- Administrativna zabrana za fizička lica - kojom Korisnik leasinga / Sudužnik daju saglasnost da radi naplate potraživanja Davaoca leasinga zaplijeni dio njegove plaće i da se izravno isplati Davaocu leasinga na način utvrđen u toj ispravi,
- Založno pravo na pokretnoj ili nepokretnoj imovini,
- Druge vrste obezbjeđenja prihvatljive za Davaoca leasinga.

10.2 Davaoca leasinga ima pravo u slučaju kašnjenja aktivirati sredstva obezbjeđenja po svom izboru, pri čemu aktiviranje jednog sredstva obezbjeđenja ne isključuje istovremeno aktiviranje ostalih sredstava obezbjeđenja.

10.3 Davaoca leasinga ima pravo zatražiti i druga sredstva obezbjeđenja ili zamjenu postojećih sredstava obezbjeđenja u slučaju da dođe do promjene boniteta izdavaoca mjenice, kao i u slučaju da neka od navedenih sredstava obezbjeđenja budu iskorištena ili izgube na svojoj važnosti. U navedenim slučajevima Korisnik leasinga je u obavezi dostaviti zamjenska sredstva obezbjeđenja.



10.4 U slučaju da Davaoac leasinga iskoristi sredstvo obezbjeđenja, a Ugovorne strane se nakon toga sporazumiju da Ugovor ipak održe na snazi, Korisnik leasinga je obavezan da najkasnije tri (3) dana od postizanja sporazuma da Ugovor ostane na snazi dostavi Davaoacu leasinga adekvatne i ispravna sredstva obezbjeđenja plaćanja kojima se zamjenjuju iskorištena sredstva obezbjeđenja plaćanja. Ukoliko Korisnik leasinga to ne učini u ostavljenom roku smatrat će se da Ugovor nije sporazumno održan na snazi.

#### Mjenice

10.5 Kao sredstvo obezbjeđenja urednog izmirenja obaveza, i to plaćanja ugovorenih naknada, dugova, kamate, pripadajućih troškova, kao i svih drugih obaveza Korisnika leasinga, nastalih po osnovu i u vezi sa Ugovorom, Korisnik leasinga se obavezuje da dostavi Davaoacu leasinga bjanko mjenice (čiji broj je određen Ugovorom) koje će Korisnik leasinga potpisati u svojstvu mjeničnog dužnika i, ako se radi o pravnom licu ili preduzetniku, iste ovjeriti pečatom svoje firme, a kojima garantuje Davaoacu leasinga za sve dospjele obaveze iz i po osnovu Ugovora, te će Davaoacu leasinga izdati i pečatom ovjeriti odgovarajuća mjenična ovlaštenja (po jedno za svaki Ugovor) kojim ga ovlašćuje da u slučaju neplaćanja bilo kog dospjelog iznosa iz Ugovora ispunji ove mjenice, prezentira ih na naplatu i preduzme sve druge radnje radi naplate potraživanja.

10.6 Potpisom Ugovora, Korisnik leasinga ovlašćuje Davaoacu leasinga da u slučaju neplaćanja bilo kog dospjelog iznosa na osnovu i u vezi sa Ugovorom ispunji takvu mjenicu i u nju unese sve potrebne elemente, uključujući i mjenični iznos koji odgovara dospjelom iznosu i da, radi naplate mjenice, preduzme sve radnje predviđene propisima. Ugovorne strane se izričito sporazumijevaju da sa postavljanjem zahtjeva i/ili preduzimanjem mjeničnih radnji od strane Davaoaca leasinga ne dolazi do novacije Ugovora, odnosno obaveze Korisnika leasinga iz Ugovora ne zamjenjuju se mjeničnim obavezama. Korisnik leasinga je izričito saglasan da se sva sredstva obezbjeđenja potraživanja Davaoaca leasinga iz Ugovora odnose i na potraživanja iz mjenica.

10.7 Ukoliko odredbama Ugovora nije ugovorena dostava mjenice, kao sredstva obezbjeđenja urednog izmirivanja obaveza, isključena je primjena odredbi 10.5 i 10.6 Opštih uslova.

#### Sudužnik

10.8 Ukoliko Ugovorne strane Ugovorom to predvide, Korisnik leasinga je dužan da obezbijedi sudužnika. Sudužnik u smislu važećih zakonskih propisa je pravna ili fizička osoba koja je odgovorna za naplatu svih potraživanja Davaoaca leasinga jednako kao i Korisnik leasinga.

10.9 Sudužnik odgovara Davaoacu leasinga za sve obaveze Korisnika leasinga iz Ugovora i ukoliko Ugovorne strane tako ugovore, u obavezi su da na ime obezbjeđenja plaćanja svih obaveza iz Ugovora i Opštih uslova predaju ugovoreni broj bjanko mjenica, popunjene na zakonom propisan način, kao i odgovarajuća mjenična ovlaštenja u broju izdatih mjenica, u korist Davaoaca leasinga te je Davaoac leasinga u skladu sa tim ovlašten da u slučaju dospelosti bilo koje obaveze iz ili po osnovu Ugovora, zahtjeva ispunjenje ili da sprovede izvršenje na cjelokupnoj imovini, kako od Korisnika leasinga tako i od sudužnika.

10.10 Ukoliko odredbama Ugovora nije ugovoreno sudužništvo, kao sredstvo obezbjeđenja urednog izmirivanja obaveza, isključena je primjena odredbi 10.8 i 10.9 Opštih uslova.

### 11. VRAĆANJE PREDMETA LEASINGA, MJESTO I VRIJEME VRAĆANJA, TROŠKOVI VRAĆANJA PREDMETA LEASINGA

11.1 Korisnik leasinga je dužan tri (3) dana prije isteka registracije, a najkasnije zadnjeg dana trajanja registracije u zadnjoj godini Ugovora, predati Davaoacu leasinga u posjed Predmet leasinga u ispravnom stanju, sa stepenom iskorištenosti koji se može očekivati prema normalnim i uobičajenim okolnostima upotrebe, sa kompletnom standardnom opremom, tehničkom dokumentacijom i svim ključevima. Nakon prestanka Ugovora, Korisnik leasinga nije više ovlašten držati, niti koristiti Predmet leasinga, te je ujedno dužan, bez odlaganja, vratiti Davaoacu leasinga u neposredni posjed Predmet leasinga i to na mjestu i u vrijeme koje odredi Davaoac leasinga. U suprotnom se Korisnik leasinga obavezuje da nadoknadi svu štetu procijenjenu od strane sudskog vještaka kojeg odredi Davaoac leasinga. Troškove eventualne procjene Predmeta leasinga snosi Korisnik leasinga, a isti će biti utvrđeni konačnim obračunom koji će biti dostavljen Korisniku leasinga.

11.2 Korisnik leasinga je u slučaju raskida Ugovora, dužan, u roku od osam (8) dana od dana raskida Ugovora, predati Davaoacu leasinga u posjed Predmet leasinga u ispravnom stanju, sa stepenom iskorištenosti koji se može očekivati prema normalnim i uobičajenim okolnostima upotrebe, sa kompletnom standardnom opremom, tehničkom dokumentacijom i svim ključevima. U suprotnom se Korisnik leasinga obavezuje da nadoknadi svu štetu procijenjenu od strane sudskog vještaka kojeg odredi Davaoac leasinga. Troškove eventualne procjene Predmeta leasinga snosi Korisnik leasinga, a isti će biti utvrđeni konačnim obračunom koji će biti dostavljen Korisniku leasinga.

11.3 Korisnik leasinga je dužan da, prije povrata Predmeta leasinga Davaoacu leasinga, sva oštećenja i nedostatke čije je otklanjanje pokriveno policom kasko osiguranja ili garancijom, otkloni i Predmet leasinga dovede u ispravno stanje.

11.4 Korisnik leasinga je dužan, prije povrata Predmeta leasinga, skinuti sve oznake i naljepnice koje su postavljene na Predmet leasinga nakon njegovog preuzimanja. Predmet leasinga mora biti vraćen Davaoacu leasinga očišćen iznutra i izvana, sa pratećom opremom koja je preuzeta prilikom primopredaje novog Predmeta leasinga.





11.5 Ukoliko Korisnik leasinga ne izvrši povrat Predmeta leasinga u stanju opisanom u članovima 11.1- 11.4, dužan je Davaocu leasinga nadoknaditi troškove povrata Predmeta leasinga u ispravno stanje, kao i ugovornu kaznu za neovlašteno zadržavanje Predmeta leasinga u visini jedne mjesečne leasing naknade za svaki mjesec zakašnjenja u primopredaji, sve na osnovu fakture Davaoca leasinga i u roku od osam (8) dana od dana prijema iste.

11.6 Ukoliko Korisnik leasinga ne izvrši povrat Predmeta leasinga na način definisan ovim članom, Davaocu leasinga, ili od njega ovlašteno lice, ima pravo bez ikakvog daljeg preduslova, o trošku Korisnika leasinga, zakonom dozvoljenim radnjama vratiti u svoj neposredni posjed Predmet leasinga, uključujući i pravo na samopomoć. U tom slučaju, Korisnik leasinga ovim putem izričito izjavljuje da je saglasan sa ovakvim načinom povrata posjeda nad Predmetom leasinga od strane Davaoca leasinga, te se neopozivo odriče prava da nadležnim organima podnosi bilo kakav zahtjev protiv Davaoca leasinga, posebno zahtjev za zaštitu zbog ometanja posjeda. Korisnik leasinga je dužan preduzeti sve mjere koje su pravno i stvarno potrebne da bi omogućio Davaocu leasinga da nesmetano uživa svoje pravo vlasništva nad Predmetom leasinga.

11.7 Mjesto i vrijeme povrata Predmeta leasinga određuje Davaocu leasinga. Prilikom povrata Predmeta leasinga bit će sačinjen zapisnik o primopredaji i pregledu vozila, u kojem će biti navedena sva vidljiva oštećenja i nedostaci na Predmetu leasinga, koji će biti potpisan od strane Korisnika leasinga. Istim zapisnikom bit će utvrđen i broj pređenih kilometara u trenutku povrata Predmeta leasinga, na osnovu kojeg će u slučaju prekoračenja ugovorenog broja pređenih kilometara biti sačinjen i obračun naknade u skladu sa odredbama člana 4. Ugovora. Također će biti izvršena i procjena Predmeta leasinga od strane ovlaštenog sudskog vještaka.

11.8 Ukoliko su na Predmetu leasinga izvršene promjene, Korisnik leasinga dužan je Predmet leasinga vratiti u njegovo prvobitno stanje o vlastitom trošku, osim za zakonom propisane promjene ili promjene za koje je prethodno pribavljena saglasnost Davaoca leasinga. Korisnik leasinga dužan je predati Davaocu leasinga i sredstva za deblokadu pogona, alarma i ostalih uređaja koje je naknadno ugradio u Predmet leasinga. Ukoliko Korisnik leasinga, odmah i na prvi poziv, a nakon predaje Predmeta leasinga u posjed Davaoca leasinga, ne ukloni vlastite stvari i opremu sa ili iz Predmeta leasinga, one postaju vlasništvo Davaoca leasinga, bez prava Korisnika leasinga na ikakvu naknadu.

## 12. ISPUNJENJE UGOVORNIH OBAVEZA

12.1 Nakon što je Korisnik leasinga ispunio sve svoje obaveze plaćanja po Ugovoru, te vratio Predmet leasinga Davaocu leasinga u ispravnom stanju i u skladu sa Ugovorom i Opštim uslovima, smatrat će se da je Korisnik leasinga ispunio sve obaveze prema Davaocu leasinga po Ugovoru. Ukoliko Korisnik leasinga ima ugovorenu valutu plaćanja, obaveze koje nisu dospjele momentom vraćanja vozila može izmiriti u roku koji je iskazan fakturom, ali će se Ugovor smatrati ispunjenim tek po isplati svih obaveza koje naknadno dospjevaju.

12.2 Neiskorištena sredstva obezbjeđenja Korisnik leasinga i Sudužnik može lično preuzeti u centrali Davaoca leasinga u roku od devedeset (90) dana od dana izmirenja obaveza po Ugovoru, a ukoliko to ne učini, neiskorištena sredstva obezbjeđenja bit će poništena.

## 13. POSEBNE ODREDBE ZA KORISNIKE LEASINGA I ZASTUPNIKE I POVEZANA LICA KOJA SE NAĐU NA LISTAMA SANKCIONISANIH LICA OD STRANE MEĐUNARODNIH ORGANIZACIJA I/ILI ORGANA BOSNE I HERCEGOVINE

13.1 Korisnik leasinga svojim potpisom na ovim Opštim uslovima potvrđuje, prema svom najboljem saznanju da niti privredno društvo koje zastupa, niti povezano društvo ili bilo koji od njegovih odgovornih direktora ili službenika, odnosno predstavnika:

- nije strana koja je predmet bilo kakvih restrikcija u poslovanju (u daljem tekstu „Strana sa ograničenjima“),
- nije angažovan u bilo kojoj transakciji, aktivnosti ili ponašanju za koje se razumno očekuje da će dovesti do toga da bude označena kao Strana sa ograničenjima,
- ne učestvuje u bilo kojoj transakciji, aktivnosti ili ponašanju koje može dovesti do kršenja primjenjivih sankcija koje su predviđene odlukama međunarodnih organizacija ili Bosne i Hercegovine,
- nije primio obavještenje ili je na neki drugi način upoznat sa bilo kojim zahtjevom, aktivnošću, sudskim ili drugim postupkom ili istragom u vezi sa Sankcijama međunarodnih institucija ili/ili organe Bosne i Hercegovine,
- ne djeluje u ime ili po nalogu bilo koje Ograničene strane u vezi sa predmetom zakupa koji je obuhvaćen ovim Ugovorom.

13.2 Korisnik leasinga se ovim sporazumno obavezuje Davaocu leasinga da:

- ne doprinosi ili na drugi način stavlja na raspolaganje svoje ukupne prihode ili bilo koji dio tih prihoda koje stiče po osnovu Predmeta leasinga, direktno ili indirektno, ili ih povjerava u korist bilo kojeg pojedinca ili entiteta radi finansiranja aktivnosti ili transfera, drugih transakcija ili ulaganja prema bilo kojoj Strani sa ograničenjima,
- direktno ili indirektno ne finansira, u cjelini ili djelimično, otplatu ili prijevremenu otplatu Predmeta leasinga iz prihoda koji potiču iz bilo koje transakcije ili aktivnosti koja uključuje Stranu sa ograničenjima,
- ne učestvuju u bilo kojoj transakciji, aktivnosti ili ponašanju koje bi predstavljalo kršenje sankcija koje se primjenjuju na njih,
- ne učestvuje u bilo kojoj transakciji, aktivnosti ili ponašanju koje bi dovelo do toga da Davaocu leasinga ili drugi član Porsche grupacije prekrši bilo koju sankciju ili za koju može razumno očekivati da će doprinijeti tom kršenju zbog čega bi se Korisnik leasinga mogao tretirati kao Strana sa ograničenjima.



### 13.3 Korištenje prihoda

Korisnik leasinga se obavezuje da će obezbijediti da nijedno njegovo povezano lice neće:

- koristiti, pozajmljivati, doprinostiti ili na drugi način stavljati na raspolaganje sav ili bilo koji dio prihoda iz bilo koje pozajmice ili druge transakcije predviđene dokumentom o izvršenoj transakciji direktno ili indirektno:
  - za bilo kakvo finansiranje ili omogućavanje bilo koje trgovinske, poslovne ili druge aktivnosti u mjeri u kojoj bi takvo finansiranje ili omogućavanje druge aktivnosti bile zabranjene sankcijama ili bi na drugi način prouzrokovale da bilo koja osoba prekrši sankcije,
  - na bilo koji drugi način za koji se razumno očekuje da će bilo koja osoba, uključujući ali ne ograničavajući se na Korisnika leasinga, prekršiti bilo koju sankciju ili postati sankcionisana strana,
- učestvovati u bilo kojoj transakciji kojom se izbjegava, ili ima za cilj izbjegavanje, ili krši ili pokušava da prekrši, direktno ili indirektno, bilo koje sankcije određene od strane međunarodnih organizacija ili Bosne i Hercegovine,
- finansirati u cijelosti ili djelimično iznose koji su u vezi sa dokumentom o izvršenoj transakciji iz procedure koja proizilazi iz bilo koje akcije koja je u vezi sa kršenjem sankcija.

13.4 Ugovorne strane trebaju uspostaviti i održavati politike i procedure razumno pripremljene radi promocije i postizanja usklađenosti sa propisanim sankcijama međunarodnih organizacija i organa Bosne i Hercegovine sa primjenjivim sankcijama.

Ugovorne strane trebaju imati odgovarajuću kontrolu i procese dizajnirane da spriječe bilo kakve aktivnost koje nisu u skladu sa naprijed navedenim.

## 14. RASKID UGOVORA

14.1 Davalac leasinga može u svako doba s trenutnim učinkom jednostrano raskinuti Ugovor dostavljanjem pisanog obavještenja Korisniku leasinga u slučajevima koji su izričito definisani odredbama Ugovora. Davalac leasinga koji raskida Ugovor iz razloga koji su predviđeni Ugovorom u skladu sa Zakonom o leasingu ima pravo na povrat Predmeta leasinga, kao i pravo na naknadu štete kako je to definisano Ugovorom.

14.2 U slučaju raskida Ugovora, Korisnik leasinga nema pravo na povrat akontacijske naknade. Davalac leasinga će sačiniti i Korisniku leasinga dostaviti obračun koji će sadržavati sva potraživanja koja proizilaze iz Ugovora i to neplaćene fakturisane leasing naknade, opomene, zatezne kamate, troškove popravke, naknadu za prekoračenje ugovorenog broja pređenih kilometara, kao i naknadu štete u iznosu koji je utvrđen Ugovorom. Obračunati iznos Korisnik leasinga je obavezan platiti Davaocu leasinga u roku od osam (8) dana od dana prijema pisane obavijesti.

## ZAVRŠNE ODREDBE

### 15. SUDSKA NADLEŽNOST

15.1 Za sve sporove proizašle iz ili u vezi sa Ugovorom, primjenjivat će se pravo Bosne i Hercegovine, Federacije Bosne i Hercegovine i Republike Srpske, a o sporu će odlučivati Općinski sud u Sarajevu.

### 16. OSTALE ODREDBE

16.1 Korisnik leasinga i Sudužnik su dužni, bez odlaganja, a najkasnije u roku od osam (8) dana od dana nastanka promjene, pismenim putem sa priloženim dokazima obavijestiti Davaoca leasinga o svim promjenama ličnog i porodičnog imena, kućne adrese, adrese poslodavca, promjenama sjedišta, poslovnog imena, osnovne djelatnosti, statusnim i drugim promjenama koje se registruju kod nadležnog organa, te promjenama ovlaštenja za zastupanje, što se posebno odnosi na lica ovlaštena za zastupanje, obim njihovih ovlaštenja i opunomoćenih lica, kao i svim drugim promjenama bitnim za nesmetano obavljanje poslovanja Korisnika leasinga sa Davaocem leasinga poput promjene zaposlenja, gubitka zaposlenja, smanjenja ili gubitka prihoda i drugih sličnih podataka. Ukoliko Korisnik leasinga ili Sudužnik ne ispunu ovu svoju obavezu, svaka dostava obavještenja i drugih pismena na adresu navedenu u Ugovoru smatrat će se važećom, bez obzira da li je Korisnik leasinga, odnosno Sudužnik primio pošiljku ili ne, a danom prijema preporučene pošiljke smatrat će se dan slanja iste od strane Davaoca leasinga.



16.2 Ukoliko je Korisnik leasinga pravno lice, dužan je do kraja prvog kvartala svake kalendarske godine, u toku trajanja Ugovora, dostaviti Davaocu leasinga svoj ovjereni bilans stanja i bilans uspjeha za prethodnu poslovnu godinu.

16.3 Posebni dogovori su valjani i obavezujući za Ugovorne strane samo ukoliko su sačinjeni u pisanoj formi, potpisani od strane ovlaštenih lica i ovjereni pečatima Ugovornih strana ukoliko je Korisnik leasinga pravno lice.

16.4 Moguća nevaljanost neke od odredbi Opštih uslova ne povlači sa sobom nevaljanost cijelih Opštih uslova. U ovakvom slučaju, nevaljana odredba će biti zamijenjena valjanom odredbom koja odgovara cilju i svrsi Opštih uslova. Na sva pitanja koja nisu regulisana Ugovorom, primjenjivat će se odredbe Zakona o leasingu FBiH/RS i Zakona o obligacionim odnosima.

16.5 U slučaju kolizije odredbi iz Ugovora, odredbi iz Opštih uslova poslovanja i drugih akata Davaoca leasinga, prioriteto važe odredbe Ugovora, a zatim odredbe Opštih uslova poslovanja i drugih akata Davaoca leasinga.

16.6 Svojim potpisom na ovim Uslovima, Korisnik leasinga potvrđuje da ih je pročitao, razumio i kao svoju slobodno izraženu volju preuzeo Uslove kao i sva prava i obaveze koje iz njih proizilaze.

16.7 Ovi Opšti uslovi su sačinjeni i potpisani u 2 jednaka primjerka, od kojih jedan ostaje kod Davaoca leasinga dok se jedan predaje Korisniku leasinga.

16.8 Davalac leasinga će o izmjenama i dopunama ovih Opštih uslova obavijestiti Korisnika leasinga o svom trošku i to objavljivanjem putem svoje web stranice, na adresi [www.porscheleasing.ba](http://www.porscheleasing.ba). Smatrat će se da je Korisnik leasinga uredno obaviješten o izmjenama i dopunama Opštih uslova danom objave istih na web stranici Davaoca leasinga.

**Ovi Opšti uslovi stupaju na snagu danom njihove objave na web stranici Davaoca leasinga.**

Jan, 2023. godine

\_\_\_\_\_  
Korisnik leasinga

\_\_\_\_\_  
Davalac leasinga

\_\_\_\_\_  
Sudužnik

\_\_\_\_\_  
Broj ugovora o leasingu

\_\_\_\_\_  
Mjesto i datum